




ALTERNATIV DEMOKRATISCH
REFORMPARTEI



Här Mars Di Bartolomeo
President vun der Deputéiertechamber
19, um Krautmaart
L-1728 Lëtzebuerg

Lëtzebuerg, den 1. Abrëll 2016

Här President,

Esou wéi d'Chambersreglement et virgesäit, bieden ech Iech, dës parlamentaresch Fro un den Här Justizminister weiderzeleeden.

D'Arbechtsrecht gesäit vir, datt z.B. am Fall vu Scholden en Deel vun der Pai ka saiséiert ginn. Fir datt de Salariaé awer „liewe“ kann, kann een Deel vum Salaire net saiséiert ginn.

Esou ass déi 1. Tranche bis 550 Euro immuniséiert. Vun 550 bis 850 Euro kënnen 10% zeréck behale ginn, vun 850 bis 1.050 Euro sinn et 20%, vun 1.050 Euro bis 1.750 Euro sinn et 25%, an iwwert 1.750 Euro kann alles saiséiert ginn. Dës Beträg gi vun der Nettopai aus gerechent. Am Fall vun enger Cessioun (z.B. op d'Schold vum Haus) leien dës Prozentsätz sinn nach méi héich.

Esou bleibt engem Salariaé, egal wéi héich seng Nettopai ass, e Maximum vun 1.505 Euro fir ze liewen am Fall vun der Saisie, oder nëmmen 1.260 Euro am Fall vun der Cessioun, dëst also manner wéi den RMG oder dem Seuil vun der Aarmut!

Trotz der Inflatoun an der Explosioun vun de Präisser um Wunnengsmaart sinn dës Beträg respektiv Prozentsätz zanter 2002 net méi ugepasst ginn.

Am Géigesaz z.B. vum RMG gëtt bei der Saisie oder der Cessioun d'Situatioun vun der Famill respektiv der Zesummestellung vum Stot net berücksichtegt.

Et ass och ze bedenken, datt den Nettobetrag deen un de Salariaé iwwerwise gëtt ëmmer deeselwechte bleibt, och wann dësen z.B. vun Iwwerstonnen oder Prime kéint benefisséieren.

Duerzou wéilt ech dem Här Justizminister dës Froe stellen:

- 1) Ass et virgesinn, kuerzfristeg d'Beträg déi net saiséiert kënnen ginn der Inflatoun an der Situatioun um Wunnengsmaart anzepassen?
- 2) Ass et virgesinn, nach an dëser Legislatur, eng Reform vum Gesetz iwwert d'Saisien an d'Cessiounen op de Wee ze bréngen?
- 3) Deelt de Minister d'Meenung, datt d'Situatioun vun der Famill respektiv der Zesummestellung vum Stot muss beim Barème betruecht ginn?
- 4) Soll bei enger Reform vum Gesetz de Riichter net d'Méiglechkeet kréien, e feste Betrag als Saisie festzeleeën, esou datt de Salariaé seng Situatioun z.B. iwwert Iwwerstonne kéint verbessern?

Mat déiwem Respekt

Gast Gibéryen
Deputéierten